

SAN PABLO KARTA KOLOSAS ÇXHABTEWE'SX JÏI

Dxus yakh fxi'zesa Kolosas çxhabtewe'sxtxi Pablo fxi'jni

1 ¹Adxa' Jesukristo jxkaahnisa Pablo yaaseth, txã'wēte selpiwa'jsa Dxus nvxiitnisa. ²Txãa pa'ga Dxus luuçx Kolosas çxhabtewe'sx jïi naa karta's fxi'ljçxa kajaçthu, Kristo's nwēese'jsawe'sxtxi weçxana yakhthē'j Timoteo yakh. I'kwe'sxtxi' Dxus kwe'sx Tata' pu'çxhina, ewçxáa kaafxi'ze'jna.

Dxus yakh fxi'zesawe'sx pa'gate Pablo Dxus yakh puutx we'weni

³I'kwe'sx pa'gate Dxus yakh puutx we'weççxa', kwe'sxtxi nwe'wesa Jesukristo Tata's wala weçxa'tha'w bagaçxtewa. ⁴I'kwe'sxa' Kristo Jesus yakh jxpubamée Dxus luuçx jxukaysa yakh puutx ya'peeygãhna ũsta' jïni'stha'w jiyu. ⁵Txã'wē i'kwe'sx jïi cielute jxaawni ũsa' txã'sna jxpa'gaya' sũhçxane'kwe txã'wē ew fxi'ze', sa' Dxus yuwe ewte nvxiitwa'jsa isasa's pta'sxte wēse'ljçxane'kwe cielutewe'sxa'sçxáa ũythasya' yajkx. ⁶Dxus yuwe ewte nvxiit-sa's pta'sxnisa açxha' txakwe walaana u'ljweça' naa kiwete mtee mteewa jxuka. I'kwe'sxwa Dxus peeygãani isasa's pta'sxte', isasa yuhna sũhna jxpa'ganijũjx, ma'wēga pehnana u'lj txã'wēy yuuça'. ⁷Kwe'sx yakhthē'j Epafxras Kristo's selpisáa txã'wēk Dxus yuwe ewte nvxiit-sa's i'kwe'sxtxi kaapiya'lj txã'sna iipe'lji'kwe. Txã' nyafxíi yu' kwe'sx yakhku mjïi pu'çxsa yu'. ⁸Txãak Dxus Espiritu yuuçxá's nwēese'jna peeygãhna ũsta' jïna pta'sx.

⁹I'kwe'sx txã'wē ew fxi'zeni's pta'sxiyna, Dxus yakh puutx we'wena nestha'w yu' i'kwe'sx pa'gate, txã'wē Dxus yakh fxi'zewa'ja's kĩhte yuhwa jxpubamée wala ew jiyuçxa txãajũ ma'wē yuhwa txutemée fxi'zekahn. ¹⁰Txãa pa'ga i'kwe'sxa' Kristo jïiyã'ljçxa', txajx jxkaahni yuuçxá's jxuka kxtey yuuna ewçxáa fxi'zeçxa Dxus yakh fxi'zewa'ja's jweeifçxáa ew piyaane'kwe. ¹¹Sa' txajũ' kĩhte yuhwa jxpubana nxusmée

weçxana çxhãçxha fxi'zene'kwe. ¹²Txã'wẽ yũuçxa Dxusa's ũusuh jxuka weçxawa'ja's ji'phune'kwe. Txã' kwe'sxtxi jxpa'gawaj pheu'jçxa ji'pha' txã'sa' ũsuna txã'sna nwẽese'jsa yuutxi' jxukaysatx. ¹³Txãak çxhi'dxte fxi'zena ũstewa, txajũ kutxi'jçxa txajx Nçxi'k wedxnisa tasxte nvxiht, ¹⁴txajx Nçxi'k peltunãyçxa nwe'wenisatha'w naa pa'ga.

Kwe'sx pa'gate Kristo uupa'ga Dxus yakh yuuwemée neeyũuni

¹⁵Dxusa' kwe'sx yafxte vxyaasame!, nawa vxyaaya' kijk txajx Nçxi'k Jesukristo kakwete. Txãasa Kristo' Dxus íçxá!, naa kiwete kijkihetewa thaakwe yaçtewe'sx. ¹⁶Dxusa' txajx Nçxi'k Jesukristo'sku neewe'weçxa nvxiht naa kiwe, cielu, kijkihçxah ũstxna, kwe'sx yafxte vxyaasáa vxite! kwe'sx yafxte vxyaasamée txáatx jxuka txãaçxaçxáa vxitkahn. Txãa pa'ga kijkihwa jxuka Kristo jũita' txajx vxitnisa, sa' txã'sçxaçxáa nwẽese'jwa'jsata!, eçxthê'j ma'tx yuu angeleswe'sx ma'tx yuu nawa jxuka. ¹⁷Naa kiwe meetey Kristo' ũsyã'kh yu!, sa' açxwa txãa íçxáa ũsa!, txajx pa'ga yuuçxáa kijkihwa jxuka ewçxáa ũsta!. ¹⁸Sa' Kristo's jxpa'gaçxa txãa yakh fxi'zesa maazkuéesatxwa jxuka Kristo íçxáa jxkaahsa!. Txãak nyafxtewe'sx yu!, sa' txãa íçxáak uuçxawa nyafxte ki' itxi yuu, txãaçxaçxáa bagaçxtewa jxkaahwa'jsa. ¹⁹Dxusa' Kristo's kaakh, nawa le'çkweçxáa yuhwa vxitemée, Dxus íçxáak yu!. ²⁰Sa' Dxusa' maa yuhtxwa nvxihtmée, naa kiwetewe'sx kijkihwa jxuka Kristo's ahçemée yuwe ewuuna pa'jwa'ja'sku vxit, Kristo's kluuste uuwa'j vxitçxa.

²¹I'kwe'sxwa nyafxii! Dxus luuçxmée i'kwe yu!, Dxusa's açewa'jçxá's yajkxna fxi'zesa, ewmeeçxáa yũuna. Nawa ewmeesaçxawa açxha' Dxus tasxte pa'jya' ajawa'ja's Dxusí pheu'kh, ²²txã'wẽ Kristo's pxthaa yuuçxa uuwa'j vxitçxa. Naasáa kwe'sx kih pkal yuhwa ji'phmée txajx tasxte yuuçxáa selpiina fxi'zekahnku txã'wẽ yũu. ²³Aça' txã'wẽ ew fxi'zeyá' ajaya!, Kristo yuuçxá's iiméh ew ũusuh jxuka yajkxna txajx yuwe ewsa nwe'wewa'jsa pta'sxni's jii i'kwe txajũ txutenuwe. Txãa Dxus yuwe ewsa nwe'wewa'jsa's txã'wẽ mtee mteewa jxuka pta'sxni yuuçá!, açá' txã'sna pta'sxkahnku Dxusa' nvxiht adxa's.

Dxus luuçxtxi selpiikahn Dxusa' Pablo's neewe'weçxa nvxiitnisa

²⁴Txãa pa'ga Dxus yuwe's i'kwe'sxtxi pta'sxpa'ga pxthaa yuuna ũsçxawa, wala weçxa'th. Nawa adx pxthaa yuuwa'j yuutxi's wa'lu'çmeeth. Kristowa ma'wêga txajx nasaa pa'gate pxthaa yuuçxa uu txãa pa'ga adxwa pxthaa yuuwa'jsath. ²⁵Dxus luuçxtxi selpiwa'jsak Dxusa' adxa's neewe'weçxa nvxiht, Dxus yuwe's i'kwe'sxtxiwa pta'sxkahn kihthe yuhwa peejxmée jxuka. ²⁶Txãniitey bagaçxte yuhwa kaajiyu'jnimeesa ũsu'ne' txã'snak Dxusa' açxha' kaajiyu'j txajx nasatx, açá' txã'sna pta'sxwa'jsath. ²⁷Dxusa' txajx yuwe kaajiyu'jnimeesa iiméh wala selpiwa'jsa yu'k judiu jil'jmée vxite nasatxwa txã'snak kaajiyu'j txajx nasatx. Txã' naak yu!:

Kristo' i'kwe'sx ūuste u'kak, txāa pa'ga i'kwe'sxa' Dxus tasxte pa'lwa'ja's ji'phi'kwe jīna pta'sxni's i'kwe jīmée yu'. 28 Aça' Kristo i'kwe'sx ūuste khēeni'stha'w kwe'sxa' pta'sxi', yu'kxpehna, kaapiya'jna, jxukaysa wala ew jiyuçaxa teeçxsa na'wēçxah Kristo yakh yuuçxáa jxpubamée fxi'zewa'ja's ew piyakahn. 29 Txā'wē yūuwa'ja's kaapiya'jnath txakwe wala çxhāçxha mji', Kristo kīhtewa jxuka pu'çxte.

2 1 I'kwe'sxa' mjiyuwe: Adxa' i'kwe'sx pa'gate vxite' Laodiceatewe'sx vxite' adxna jiimeesa ūstxna txāawe'sx jxukaysa pa'gate iiméh wala pa'pçxuna Dxus yakh puutx we'wena ūsthu. 2 I'kwe'sx jxukaysa Kristo ma'wēsatewa kīhte yuhwa peejxmée jxuka ew jiyukahn txā'wē pa'pçxuna ūsthu. Txāa Kristok i'kwe'sx ūuste khēewa'jsa yu' txā'snak txāniitey kim yuhtxwa kaajiyu'jnimée ūsu'. Aça' txā'sna ew jiyuçaxa' jxpubamée i'kwe'sx pwe'sx puutx ya'peeygāhna fxi'zene'kwe. 3 Txāa pa'gatey ma'wēçxah jiyuwa'j peejxtewa, Kristo yuuçxáak ūsu'. 4 I'kwe'sxtxi' txā'wēth ew āate pta'sxi', vxitesa īsxiina zhiçxkwe we'wena kaypuba'jwe'sxte. 5 Adxa' i'kwe'sx yakh ih ūsmeeh, nawa i'kwe'sx yakh ih ūs na'wē yajkxna ūsthu ūuste yu', txāasath wala weçxá', Kristo yakh yuuçxáa jxpubamée fxi'zepa'ga.

6 Txāasa Jesukristo's ma'wēkwe nyafxī weçxana jxpa'ga txā'wēesa mfxi'zewe txāa yakh txutemée. 7 Bagaçxtewa Kristoçxá's yajkxna txāa yuuçxá's nwēese'jna Dxusa's weçxana fxi'zewa'ja's i'kwe kaapiya'jni yuu, txajū txutenuwe.

Kristo itxi yuupa'ga kwe'sxwa pkaluh itxi yuuni

8 Txāasa i'kwe'sxa' wala mpa'yajkxwe, naa kiwete nasaa pwe'sx yajkçxcha kaapiya'jniçxá's pta'sxna kaypuba'jwe'sxte. Txāawe'sxa' Kristo kaapiya'jni's kaapiya'jsamée, ewmeesa jxkaahniçxá's kxtey yuusata'. 9 I'kwe'sxa' txā'wē kaapiya'jni's nwēese'jwa'jsa mee'i'kwe, txāa pa'gatey Kristo' Dxus ma'wēsatewa txāawa txā'wēysafiçxá'. 10 Aça' i'kwe'sxa' txā'sna ūuste jxpa'ganijū' Kristo yakh teeçxçxáa i'kwe yuuna pa'ja'. Txāa pa'ga jwee yu' vxite yu' kīhwa peejxmée yā'jl'kwe, txāa pa'gatey Kristoçxaxçxáa jxuka jxkaahsa' naa kiwetewe'sx vxite' ēe walasu ewmeesa ūstxna txāa yā'lçxcha. 11 Kristo's ūuste jxpa'ganijūyā'ja', cirkuncidāyni na'wē yā'jl'kwe neeyū'. Nawa peekx kakwetewe'sxna cirkuncidaī'tx txāamée, i'kwe'sx ewmée yūuna fxi'zenijū Kristo nwe'wenisa cirkuncidāyni yaase'. Kristo' txā'wēçxáak yu'. 12 Txā'wē yūunijū' i'kwe'sxa' yu'te ya'bautisāyçxa' Kristo yakh ja'da pedani na'wēsa i'kwe yuu, sa' Kristo yakh ja'da ki' itxi yuusáa na'wē i'kwe yuu, txā'wē Kristo uutewa Dxusa' ki' itxi vxitku sūhwa'ja's ji'phui'kwe naa pa'ga. 13 Nawa nyafxī yu' i'kwe'sxa' pkalpa'ga Dxus dxi'pte uunī na'wēi'kwe ūsu', pkaluh txudenimée. Txā'wētewa āçxha' Dxusa' pkaltxi jxuka peltunāypa'ga i'kwe'sxa' Kristo na'wēy itxi yuusáa na'wē i'kwe yuu. 14 Kwe'sxa' Dxus jxkaahni's nwēese'pha'gamée

yuuwesane'tka'w yu'. Nawa Kristo kluuste uupa'ga Dxusa' jxuka peltunäyku. ¹⁵Sa' txã'wëçxáa yuumée, eçxthē'j txãa yakh ũssa yã'jçxa jxuka knayçxa Kristoçxaçxá's bagaçxtewa nwëese'jwa'ja's vxitçxak nvxiht Dxusa'.

Naa kiwetewe'sxa's nwëese'jmée cielutewe'sxa'sçxáa mpaakwewe

¹⁶Txã'wë Kristo nwe'wenisa yã'ja' äçxha' kim yuhwa leya's nwëese'jwa'ja's jxkaahwa'j ji'phmeeta', i'kwe'sx ũ'ni's we'wena meeçxa' ki'swa'j en txã'wësatx. ¹⁷Txã'wë yūunisa' naasáa teeçx pa'jwa'jsa ũsu'k txã'sna jxpa'gawa'ja's kaapiya'jsaçxáatx yu'. Aça' ew jiyute yu', txãa pa'jwa'jsa' Kristok yu'. ¹⁸I'kwe'sxa' ĩsxiisawe'sxtxi mpa'yajkxwe. Txã'wëme', txãawe'sxa' wala ewsatha'w jina angeleswe'sxtxi neewe'wena, kīhwa uysameeçxawa txã'wë ewsaxá's i'khsatha'w jina iwejçx we'wena i'kwe'sxtxi kaypuba'jatxna. ¹⁹Txãawe'sxa' Kristo yakh fxi'zesameeta'. Kristo yakh fxi'zewaç yu', wala yuh ewna, txãa pa'gately Kristo kīhtewa jxuka kçxhãaçxha'jna txajx nasa yuutxi' jxpe'jsa', Dxus jxkaahni's kxtey yuuna.

²⁰I'kwe'sxa' naa kiwete piçthē'jwe'sx we'weni's nwëese'jya'mée, Kristo yakh ja'da uusáa na'wë yuusáa i'kwe. Sa' çkījxa'çxáa piçthē'jwe'sx we'weni's nwëese'jwa'jsamée yã'jçxa', txãawe'sx txã'jina jxkaahnitxi' nwëese'jna ũsuki'kwe? ²¹Txãawe'sxa' na'wëtx jxkaaja': Txã'sa' jxa'dxnu, txã'sa' ũ'nu, txã'sa' jxpa'ganu jina kījkīhwa wala jxkaaja'tx. ²²Txã'wë jxkaahnisa' naa kiwete piçthē'jwe'sx kaapiya'jnisaçxáata', jxuka skhēwwa'jsa. ²³Txãatx jxpa'yakxmeete', ewsa na'wë yuh theguna, txãa pa'gately iwejçx yajkxmée peekx kakwe's ew kaafxi'ze'jwa'ja'sku jxkaaja'. Nawa naa kiwete ewmée yajkxna fxi'zeni's yu' neeweya' äja'çme'.

3 ¹I'kwe'sxa' Kristo yakh ja'da ĩtxi yuusáa na'wë yuusáa yã'jçxa', cielute iiméh zhiçxkwesa bagaçxtewa wët fxi'zewa'ja'sçxáa mpaakwewe, Dxus pukate Kristo ũsnitewe'sxna. ²Naa kiwetewe'sxa's yajkxmée, cielutewe'sxçxá's myajkxwe, ³txãa pa'gately i'kwe'sxa' Kristo yakh ja'da uusáa na'wë yuupa'ga, Kristo yakh fxi'zeç'i'kwe Dxus tasxte. ⁴Sa' i'kwe'sxtxi ĩtxi kaafxi'ze'jsa Kristo vxyaate', i'kwe'sxwa txãa ma'wësatē' txã'wëysa yuuçxa txãa yakh ih ũsya' ul'jwene'kwe.

Ewmeesatxi' nvxihtçxa ew yūuna fxi'zenitx jxpa'gani

⁵Txãa pa'ga i'kwe'sx ũus yaakxni ewmeesa naata' txãatxi' jxuka manvxihtwe: ptamumey pkalte fxi'zeni, ptamsaçxawa vxitesa yakh pkal yūuna fxi'zeni, kīhwa ewmée yūuwa'jçxá's yaakxni, Dxus yu's yajkxmée jwee'içxáa ji'phu wēna fxi'zeni, (txã'wë ji'phu wēniçxá's yajkxte', txã'sçxáanak Dxus na'wë yaakxwa'j kaseje'.) ⁶Txã'wë ewmée yūupa'ga i'çxáa Dxus kastigo seena'sa yuja' Dxusa's nwëese'jsameewe'sxtxi. ⁷I'kwe'sxwa txã'wë yūuna fxi'zesai'kwe yu'. ⁸Nawa äçxha' na'wësatx

jxuka manvxihtwe: pxũuskwe yaakxni, ũusçxani, vxitetx ewmée nuywe'weni, wēesxuni, kazx we'weni txā'wēsax. ⁹Txā pa'gatey jxuka nvxiht yā'ji'kwe na' puutx ya'isxiina fxi'zemée, ¹⁰ewçxáa yũuna fxi'zewa'ja's jxpa'gaçxa ũsi'kwe. Txā'wē yũuçxa' i'kwe'sxa' jwee'íçxáa ya'yu'pthehna u'jwene'kwe, Dxusa's ew jiyuna pa'jçxa txāa na'wēy yuuna pa'jya'. ¹¹Aça' txā'wē ya'yu'pthehnisa' maawa jxuka kxteeçxah teeçxçxáa yuuna pa'jsata'. Judiuwe'sx ma'tx yuu, judiuwe'sxmée ma'tx yuu, cirkuncidāynisawe'sx ma'tx yuu, cirkuncidāynimeesawe'sx ma'tx yuu, wala jiisa ma'tx yuu, jiimeesa ma'tx yuu, patron ji'phsa ma'tx yuu, patron ji'phmeesa ma'tx yuu nawa maawa jxuka kxteeçxah teeçxçxáa yuuna pa'jsata'. Txāa pa'gatey Kristo's jxpa'ganiçxáa txā'wē', Kristo jxukaysawe'sx ji'.

¹²I'kwe'sxa' Dxus peeygāhçxa txhitxnisai'kwe, txāa pa'ga i'kwe'sx ũuste na'wēsax jxpa'gaçxa mfxi'zewe: vxitetx peeygāawa'ja's, pu'çxna fxi'zewa'ja's, iwejçx yajxmée maa yakhwa jxuka ewçxáa fxi'zewa'ja's, puutx ũusçxa yajxmée fxi'zewa'ja's. ¹³Makwe ewmée nuywe'wetewa puutx ya'peltunāyna mfxi'zewe. Kristowa ma'wēga i'kwe'sxtxi peltunāy txā'wēy myũuwe i'kwe'sx pwe'sx. ¹⁴Sa' peeygāhna fxi'zewa'j yuuçxá's kíhtewa thaakwe wala mji'phuwe. Txāa maatewa thaakwe peejsa'. ¹⁵Txā'wē yũunijũ' Dxusa' ũsuna jxukaysa kxteeçxah ũuste wēt weçxana fxi'zewa'ja's. Txā'wē jxukaysax kxteeçxah teeçxçxáa vxit-ya'íçxáak Dxusa' i'kwe'sxtxi txhitxh, txāa pa'ga mweeçxawe. ¹⁶Åçxha' Kristo kaapiya'jni's i'kwe'sx ũuste jxuka mpiyawe. Txā'wē yũuçxa puutx kaapiya'jna, wala jxpa'yakx puutx yu'kxpehna, Dxusa's ũuste weçxana memna mfxi'zewe. ¹⁷I'kwe'sxa' kíh yũuna ũsçxawa, Kristo Jesusa's tuuthe'jwa'ja's yuuçxáa myajkxwe, Dxusa's yuuçxáa weçxana.

Yattewe'sx maa yakhwa jxuka ya'nwēese'jna fxi'zeni

¹⁸Nyuuwe'sxa' i'kwe'sx nmi'tx nwēese'jwa'j ji'phi'kwe. Kristo's jiiyā'jçxa', zhiçxkwe fxi'zewa'ja'. ¹⁹Aça' nmi'we'sxwa peekx nyuu yakh puiina yahçemée peeygāhna mfxi'zewe. ²⁰Txā'wēy luuçxwe'sxwa i'kwe'sx neywe'sxtxi kíhtewa jxuka mwēese'jwe. Txā'wē yũuni's Dxusa' weçxa'k. ²¹Neywe'sxa' peekx luuçxtxi zhiçxkwe yu'kxpehna miipe'jwe pkxuumée, i'kwe'sx yakh kuçxkahmen. ²²Selpisaawe'sxa' naa kiwete i'kwe'sx patronwe'sx jxkaahnix wa'lmée mwēese'jwe kíhtewa jxuka. Patronwe'sx thegna ũste āajuçxáa nwēese'jmée, ũusuh jxuka wa'lmée mwēese'jwe, Dxusa' jiina sũhna. ²³Kíh mjiiççxawa wa'lmée Kristo's selpiiçthu sũhnaçxáa kxtey myuuwe, nasax selpiiçthu sũhmée. ²⁴Txā'wē yajkxna selpiipa'ga, Kristo' i'kwe'sxtxi' cielute deweena, txāa pa'gatey Kristo jii sũhçxane'kwe mjii naa pa'ga. ²⁵Nawa maawa wa'l yajkxna mjiiisa' açxamée ewsaçxá's jxpa'gatxna, txāa pa'gatey Dxusa' jxuka jiia' ma'wē yũuna fxi'zesatewa.

4 ¹ Patronwe'sxa' i'kwe'sxtxi selpisaatx ewçxáa jxpe'jna meswe. Txã'wēme', i'kwe'sxwa selpisáa íçxáa i'kwe, i'kwe'sxtxi jxkaahsa' Kristo cielute ũsa'.

² Āçxha' wala jxpa'yakx Dxus yakh yuuçxáa puutx we'wena meswe, peçxkanamée Dxusa's weçxana. ³ Sa' kwe'sx pa'gatewa txã'wēy Dxus yakh puutx we'wena meswe, Dxus yuwe pta'sxwa'j en vxyaakahn, kxah Kristo's ma'wē ũuste jxpa'gawa'ja'swa jiyunimeesa's pta'sxi'nja. Txã'wē pta'sxpa'gáiçxáa adxa' preesu ũsthu. ⁴ Nawa Dxus pu'çxte', xsiigmée ew áate kaajiyu'ju'nja.

⁵ Dxusna jiimeesawe'sx yakh wala jxpa'yakx ewçxáa mfxi'zewe, ewmée we'wekahmen. Sa' Dxus yuwe pta'sxwa'j ena's ivxiitnuwe. ⁶ I'kwe'sxa' zhiçxkwe ewçxáa jxpa'yakx mwe'wewe. Txã'wē yūuçxa', ma'wēsa yakhwa thēmée pasya' ājane'kwe.

Yuwe weçxaa kaahnitx fxi'jni

⁷ Kwe'sx yakthē'j Tíkiko Kristo's selpiik adx yakh ja'da kíhtewa pu'vxitumée pu'çxna txã' i'kwe'sxtxi pta'sxina adx fxi'zeni's. ⁸ Txã'wē pta'sxna i'kwe'sxtxi kçxháaçxha'khan kajaçthu. ⁹ Txáa yakh teeçx pi'kxna yuja', Kristo's jxpa'gasa kwe'sx yakthē'j Onésimo. Txã' i'kwe'sx çxhabteywe'sxa'. Txáawe'sx pa'lçxa jxuka pta'sxitxna aysū kíhçxah yūuçtewa.

¹⁰ Karcelte adxna pi'kxna ũssa Aristarkowa yuwe weçxa kaja'k, vxite' Bernabé pukakhē nyakh Markoswa. I'kwe'sxa' jiiyā'ji'kwe Markos ma'wēsatewa, txáa pa'ga wa'lmée mpa'gawe. ¹¹ Jesus Justo jī'tx txáawa yuwe weçxaa kaja'k. Judiuwe'sx Kristo's jxpa'gasa adxa's pu'çxsa yu' txáawe'sx yuuçxáatx yu', Dxus jxkaahwa'ja's pta'sxsa. Txáa pa'ga adx yakha' wala weçxa yuja'. ¹² Kristo's selpisáa Epafxraswa yuwe weçxaa kaja'k. Txã' i'kwe'sx yakh ũssak yu'. Txã' i'kwe'sx pa'gate bagaçxtewa Dxusa's neewe'wena nesku yu', kíhtewa jxpubamée Dxus jxtháasniçxá's kxtey yuuna fxi'zekahn. ¹³ Adxa' jiith Epafxrasa' i'kwe'sxtxi yajkxna wala pa'pçxu'k, Dxusa's neewe'wena. Sa' Laodicea çxhabteywe'sx vxite' Hierapolis çxhabteywe'sxtxiwa txã'wēyku Dxusna neewe'we'. ¹⁴ Médiko Lukas vxite' Demas txáawe'sxwa yuwe weçxaa kaja'tx.

¹⁵ Yuwe mweeçxawe yakthē'jwe'sx Laodiceateywe'sxtxi vxite' Ninfxasna, sa' txajx yatte pkhaakhesawe'sxtxiwa txã'wēy. ¹⁶ Naa karta's i'kwe'sx pwe'sx lēeyna jxã'lçxa', mkaahwe Laodicea çxhabte pkhaakhesawe'sx lēeykahn, sa' Laodicea çxhabteywe'sxtxi karta kaath txáa karta i'kwe'sx tasxte pa'the', txã'snawa mlēeywe. ¹⁷ Arkiposa's na'jīna myu'kxpehwe: Kristo mjīia's kxtey myuu jīna.

¹⁸ Adx kuseju yuu naa karta's fxi'lçxa kajaçthu i'kwe'sxtxi weçxana. Nawa adxa's peçxkanamée yajkxna mfxi'zewe, preesu ũsthu naa pa'ga. I'kwe'sxtxi' Dxusa' pu'çxhina.